



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

Roma nung Donyell Malendenogo

Khamenei-i link mepetmesü atema US aser Israel na aitsü



VOL. XXIII ISSUE NO. 95 (ADOK 95) DIMAPUR AMUNGNÜ (SUNDAY) AENJETI (JANUARY) 18, 2026

₹ 5.00

PAC-i 'Naga Common Platform' tentettsü ayongzüker

Dimapur, January 17, 2026 (TYO): Nagaland nung civil societies balala tsüngda telemsa aliba angatetteptsü atema 'Naga Common Platform' ka tentettsüla ta Nagaland Government Political Affairs Committee (PAC)-i ayongzüker.

Honibarnü Rhododendron Hall, Chümoukedima nung Chief Minister Dr. Neiphiu Rio menden ser PAC senden amen.

"Naga yimten tebilemtsü atema jembitepba sülen PAC-i Naga tebilemtsü jembitsü atema telok ka alitsüla ta lemteta liasü. Telok balala lemsar aliba denbo iba ama telok kati dang mapa tuluba inyaktettsü" ta Deputy Chief Minister aser PAC Co-Convenor, T R Zeliang-i ashi.

"State sorkari Naga kin hohotem dang külemi longjemtsü aser Naga yimten teloktema sabang ka kübok longjemtsü ajungmesotsü mepishir. Naga yimten ya ka dang latettsü" ta pai ashi.

Sorkari taküm asoshi nükjiding tongtibaji asenok sasap nung telemsa adoka aliba agentsüba lir. NGOs aser telok onsara tentetba ajanga o balala jembir aser iba ajanga Naga nungertebilemba menentsüogo ta TR Zeliang-isa ashi.

MLA tem ya Constitution of India kübok public atema noktaker aser PAC-ibo civil society sabang ka alitsüba kanga nüngdak aser yimtenren olemtep asoshi iba olaji tongtipang ta bilemer ta paisa ashi.

Tanü senden nung PAC-i bangzüng kecha merenem saka yimtenren tsütsü tekong merangtepba onük benoka lemsatepa liasü.

Iba ya masüdag Chief Minister aser PAC Convenor Dr. Neiphiu Rio menden ser cabinet ka amendang Dimapur Railway station renloksü aser Dimapur Airport ulushitsü atema tetsükdaktsü ajurubatem lemsatep.

"Onoki Ministry den jembitsü aser tanga lenmangtem bushiteptsü lemtetogo. Assam Rifles-i tang aliba tesem toktür aotsü memulungra parnoki asenok nem airport tasen ka agütsütsüla" ta CM Dr. Rio-i ashi.

"Naga yimten tebilemtsü atema onoki teyariteper tajung ka ama inyaktsü. MLA ka aser Political Affairs Committee züngsem ka ama onoki kanga meranga inyaktsü kechiyong onok nem iba tebilemtsü khuret agütsüogo" ta MLA Achumbemo Kikon-ia ashi.

ANCSU-i NPSC ket nung Assistant Professor mapatem agütsütsü rongshir

Dimapur, January 17, 2026 (TYO): All Nagaland College Students' Union (ANCSU)-i Higher & Technical Education Department dang Nagaland Public Service Commission (NPSC) ket nung Assistant Professor mapa 129 agütsütsü takhangba agütsüogo.

State sorkar aser department-i Assistant Professors mapa 129 adokdaktüba atema pelar saka Manpower Rationalization Committee (MRC)-i August 11, 2025 nü tebilemba abenba aser ano August 30, 2025 nü State Cabinet-i agizükaka Assistant

Professor mapa 129 NPSC dangi mabenba atema tebilemtsü abener ta ANCSU-i ashi.

Sorkar jenjang nung administrative clearance ajunga temogo anungji kodaser bangdak department-i Assistant Professor mapa 129 NPSC ket nung magütsür ta pamokisa asüngdangogo.

Assistant Professor mapa 129 tangsa NPSC ket nung agüja recruitment process tenzütsüla aser iba mapa tekaraba nung inyakba ajanga Higher Education akangshitsü aser kaketshirtem tebilemtsü tuluba küma moudaktsü sotsü ta ANCSU-isa metetdaktüogo.

PM-DeVINE, NEC schemes reprangdang

Dimapur, January 17, 2026 (TYO): January 17, 2026 nü Dimapur district nung Prime Minister's Development Initiative for North East (PM-DeVINE) aser North Eastern Council (NEC) schemes inyakba reprangdangogo.

Ministry of Development of North Eastern Region (MDoNER) nung Joint Secretary Angshuman Dey-i Nagaland semdangi arudang iba ya inyaka liasü.

Joint Secretary Dey-i 220/132kV (2×100 MVA) aser 132/33kV (2×50 MVA) Tsitrongse-Dimapur substation yangluba semdanga liasü. Iba ya PM-DeVINE scheme kübok inyaker.

Paisa CIHSR, Dimapur nung Radiation Oncology Department

yanglushiba reprangdang. Iba ya-a PM-DeVINE scheme kübok inyaker aser cancer care facilities tashi itshitsü aser advanced treatment services atema yanglur.

Iba mapang Chief Engineer (Transmission & Generation) Er. Kasho Chishi, Secretary, Power Department Joint Secretary Asangla Imti aser Development Commissioner Tamsunaro Aier, IAS nungeri Joint Secretary Dey meina senzü.

Dey-i implementing agencies aser district ketdangsürtem den jembidang mapang shitak nung mapa tembanga inyaktsü, quality standards benshitsü aser senotsü timi amshitsü ayongzüka liasü.

Paisa North Eastern Council (NEC) kübok mapatong balala inyakba reprangdangtsü.

East Dimapur Aor Telungjem tenzüker



Purana Bazar nung Dr. Temsuwati'er kidang East Dimapur Aor Telungjem (EDAT) tenzüker sentong nung tayongzüker o jembir Er. Lobosang Jamir aser EDAT ketdangpur den Sanen Luden züngsem tasentem külemi agiba noksa ka angur.

Dimapur, January 17, 2026 (TYO): Dimapur kübok Dhansiri ayong ser anüdoklen tsütsü East Dimapur ta ajaba tesem nung Aortem asoshi sabang tasen ka tanü tentetogo.

Ao Senso Telongjem Dimapur (ASTD) nungi temelaba ngur January 17, 2026 nü East Dimapur Aor Telungjem (EDAT) ta ser Aor temeja asoshi sabang ka tentetogo aser iba ya mapang talangka nungi kanga dang aginüa aruba pungmang ka asangsang nung atalokba lir ta East Dimapur nung Aor tanishir aikati ashi.

Honibarnü EDAT tenzüker sentong ya Seasonal Ketdangpurtem lenisüba kübok Purana Bazar nung Dr. Temsuwati'er kidang ayongzüker agiogo.

"East Dimapur nung aliba Aortem telong tenteta pressure group ka mali aruba ajanga takoksa aika ajangshia aruogo

aser Aor sabang ka kanga nüngdaker ta jembia aruba tanü asangsang nung atalokogo" ta sentong nung tayongzüker o jembir Er. Lobosang Jamir, Additional Chief Engineer, Power, GoN-i ashi.

Paisa iba telok tasen nükjiding atongtsü atema teka amteper külemi yaritepa tejakleni aotsü aser metsüngareta aoba telok ka asütsü ayongzüker liasü.

Iba sentong nung Ao Baptist Arogo Padampukhuri Pastor Wb. Chubatemjen-i Lai zünga sarasadem, Wb. W. Matsung Jamir-i tepela o jembir, East Dimapur Ao Baptist Arogo Pastor Rev. Jongpong Imsong-i EDAT tenzüker tasen atema sarasademtsü aser Yir YAT Wb. I. Lipok Ozukum-i melepzüng o jembia liasü.

EDAT nung ketdangpurtem
Chairman: Dr. Temsuwati (Longsa) Purana Bazar

Vice Chairman: Purkumzuk Jamir (Akhoya) Naharbari
General Secretary: Ayimkitang Aier (Molungyimsen) Padampukhuri
Joint Secretary: Supongakum (Changtongya) Darogajan
Finance Secretary: B. Nungsang Aier (Yajang) Padampukhuri
Treasurer: Er. Limatongdang (Mopungchuket) Purana bazar.

Ketdangpurtem metanga nungittsü atema tesem ajaklen nungi Sanen Luden 27 shimetogo.

East Dimapur kübok yimtsüng 7 tashi EDAT nung adener.

1. Purana bazaar,
2. Purana bazaar B,
3. Naharbari,
4. Padampukhuri,
5. Kushiabil,
6. Yimsem (Eralibil, Dubagaon, Ekranipathar)
7. Darogajan/ Bamunpukhuri/ Samaguri.

Union Minister Choudhary-i Noklak district semdang

Dimapur, January 17, 2026 (TYO): Union Minister of State for Agriculture and Farmers' Welfare, Government of India Bhagirath Choudhary-i January 16, 2026 nü Noklak district semdangogo.

Union Minister temi North Eastern Region nung Fortnight Visit nung shilem ka ama pai Nagaland semdanga liasü.

Hokolbarnü Tourist Circuit, Noklak nung Union Minister Choudhary-i district nung terenlok mapa inyakbatem meyipa reprangshitsü atema department ketdangsürtem den sensaksem ka liasü.

Paisa Noklak district nung Krishi Vigyan Kendra (KVK) ka amenoktsü aser iba ajanga agricultural extension services tashi aittsü aser aluyimertem yaritsü ta nangzüker.

Iba senden nung Noklak Deputy Commissioner Mono Khiamniungan-i Noklak district indang osang lemsatepdang terenlok mapa inyakba den tayongzüker balala ajuruba metetdaktü.

Senden nung SDO (Civil),

Vikphoto Richa-i Aspirational Block, Thonoknyu indang osang metetdaktü.

Agriculture aser Allied Departments nungi ketdangsürtemi Union Minister Choudhary den district nung mapatong balala inyakba lemsatepa liasü.

Agriculture Department-i Union Minister dang storage facilities aliba Farmers' Multi Marketing Complex ka yanglutsü mepishia liasü.

Iba sülen Union Minister Choudhary den district administration dena District Hospital semdang aser idangji Chief Medical Officer, Dr. Victor-i tebilemtsütem lemsatep.

Dr. Victor-i District Hospital nung doctor peria maliba, scrub typhus kanga buluba, district nung typhoid agi kanga shirangtepba aser maternal healthcare services tajungba akümtsü asoshi Gynecologist ka nüngdakba metetdakja liasü.

Maneni, Union Minister Choudhary-i January 17, 2026 nü New Pangsha village nung Village Guard Museum semdanga liasü.

Iba yimtsüng nung sentong ka agidang agricultural productivity tajungba akümtsü aser aluyimertem ajangzüktü asoshi Krishi Vigyan Kendra (KVK) ka amenoktsü nüngdaker ta Union Minister-i ashi.

Paisa aluyimertem dang PM-KISAN Credit Card meshitsü aser linük ajungalen renloksü atema aluyimba ya kanga tongtipang lir ta ashi.

Choudhary-isa sensaksemba mapang sorkari tsünusenbongtsü raksaba atema senotsü teyari agütsür asü masü ta asüngdanga liasü. Paisa iba tesem nung tetsürtem jenjang metetnüa asüngdang aser drug abuse kanga buluba atema tebilemtsü lemsatep.

Pangsha nungeria Union Minister Choudhary den pamok tebilemtsü lemsatep aser aluyimba jenjang tajungba akümtsü asoshi modern agricultural machinery nüngdakba ashi.

Iba sülen Union Minister Bhagirath Choudhary-isa COB, International Trade Centre, Dan semdanga idakji aliba security officers den senden ka amen.

Maova yimtsüing nung Mimkut benjung takok ngua mungogo



Dimapur, Aenjeti/January 17 (TYO): January 17 nü Maova yimtsüing nung Mimkut benjung tananübuba takok ngua mungogo. Iba sentong nung alakteta jaoker Principal Secretary Geology and Mining, P&NG, Science and Technology I Himato Zhimomi, IFS-i Mimkut nüngshilong sayaja liasü.

Sentong nung Chief Host, L Singsit IPS (Rtd), tir Kuki Inpi Nagaland, ADC Medziphema, P James Swu, sorkar tenzükerterem, yimtsüing lenirtem aser nübürtemi shilem agia liasü. Iba nüngshilong ya Executive Secretary KCCNS Rev. David Vaiphei-i bendanga agüja sarasademja liasü.

Alakteta jaokeri iba sentong nung shilem agitsü asoshi pa jaokba atema kanga pelaba lemsatepba den Tsüngrem nem tenüingsang agüja liasü. Paisa,

anogo ana tashi Mimkut benjung kanga takoka ayongzüka munga Kuki nunger takar sobaliba sayaba atema Kuki nunger aser Benjung ayongtertem nem tenüingsang agüja liasü.

Alakteta jaokerisa, Mimkut benjung amungba ya koda tongtibang iba indang lemsatepba den Kuki nunger den mapang talangka nungi tesendaktep tajung aliba lemsatep. Pai Mezüngbuba MLA Lamkam aser tebu Ex Minister Ihezhe Zhimomi, na1964 küm nungi metettepa aruba indang lemsatep.

Paisa, tarutsü nunga tesendaktep akangshitsü aser wazüka ayutsü koda tongtibang iba indang lemsatepba liasü.

Maneni pai nübürtem dang ali wazüka ayutsü ajungshi. Paisa, ali ya four-lane highway aser railway-line tasenba agi

kongshia lir asüning terenlok atema kanga tongtibang ta ashi. Paisa, ali kanga anepalua amshitsü ayongzüka den Kuki nungertem yimjiyimjung nung alitsü imlaja ataba lemsatepba liasü.

Mimkut benjung tananübuba gosem saya, Molvom, Kuki community Medziphema town, Zhuikhu yimtsüing, Kuki union aser Khaibung nungeri sobaliba tsüingsang sayaba amala sentong balala agiogo.

Sentong ya Nekhomang Hansing aser Chongboi Singson na lenisüba nung agi, Sentong nungsa Executive Secretary, KCCNS Rev. Seimang Haokip-i sarasadem, L. Singsit IPS (Rtd), President Kin-i lokti pela agizükba o jembi, Lulen Kholhou-i tepela o jembi aser KBC Maova pastor Ngambom Hansing-i tatem sarasadem agia liasü.

Nagaland Climate Action Forum atema osangbenertem den sensaksem



CEO, DMC Thungchanbemo Tungoe lenisüba nung Nagaland Climate Action Forum 2026 dak sendakba nung January 16 nü osangbenertem den sensaksemba mapang tangokba noksa nung angur.

Dimapur, Aenjeti/January 17 (TYO): Taruba Nagaland Climate Action Forum 2026 dak sendakba nung January 16 nü Dimapur Municipal Council (DMC) CEO indang office chamber nung osangbenertem den sensaksem sentong ka agiogo. Iba sentong ya CEO, DMC Thungchanbemo Tungoe lenisüba nung agia liasü.

Osangbenertem den sensaksemba mapang CEO-i, Nagaland Climate Action Forum 2026 ya January 21 nü nikongtsütsü 2 ako nungi tenzüka Hotel Saramati, Dimapur nung "From Heat to Action: Rethinking Urban Resilience in Dimapur" omen nung ajemdaker agitsü, ta metetdaksü.

Paisa, iba forum ya Run for Green Dimapur sentong maneni benokyonga inyaka aoba sentong ka lir aser urban climate challenges nung inyakyim melenshiba ka lir ta ashi.

Pai, Nagaland indang commercial aser urban hub ama

Dimapur ya tzümopung melenshiba ajanga temperature tali akümba, tzümetsüing agi kongshiba, infrastructure nung pressure aser public health dak sendakba nung tebilemtsü amala agi amokmerener aser ibayongji tzümopung dak apet sentongtem yanglutsü kanga nüngdaka kümogo, ta ashi.

Sentong agiba mapang working white paper ka sayatsü aser iba sülen urban climate resilience, sustainable city planning aser kuli dak ajemdaker policy yanglutsüba dak sendakba nung stakeholder balala sensaksem ka akatsü.

Sentong nung o jembiba mapang Director, Earth Alliance Nagaland L. H. Thangi Mannen-i, tzü mopung melenshiba ya tarutsü atema amokmeren ka masü saka iba yagi asenok menepa tokogo ta shia, tsüingsang mopung kanga majungba, mopung tatsükaba akümba, tzümetsüing tali aruba

aser health dak sendakba nung lendong taliba küma aoba indang tatishitsü benoka jembi. Laisa, tzü mopung melenshiba aoba den raratsü aser nübürtem libaliro kümzüka ayutsü atema kija, lokti, riju aser sorkar agency balala longjemer inyaksü ayongzüka liasü Policy Analyst, NYC Fellow Boka K. Rochill-i, climate action nung local sorkar aser municipalitty tem ya frontline nung lir ta ashi. Paisa, iba forum ajanga police yanglur, urban planners, lokti tentet balala, lanur teloktem, environmental expert aser lokti nung stakeholder tem adenshidakja ken o bentettsü asoshi sensaksemtsü meranger, ashi.

Maneni media dang tzü mopung melenshiba dak sendakba nung khuret tali abentsü aser nübürtem nem tangazükba agütsütsü aser forum matong tsüngda nübürtem den tali sendaktepa atatsü mepeshia liasü.

Kohima DC-i gari senzügenpong indang metetdaksü

Dimapur, Aenjeti/January 17 (TYO): Deputy Commissioner aser Regional Transport Authority, Kohima mendenbuba, B. Henok Buchem, NCS-i sangdong ka ajanga, Khouchiezie Local Ground den atonga tawa yangluba bypass lenmang koba ajanga South Gate aser North Gate na sendakteptsür iba lenmang ya gari senzügenpong (LMV atema dang) atema lapoktsüogo.

Tetuyuba ajanga ashiba agi, lenmang ya one-way dang asütsü aser garitem ya South Gate nungi Khouchiezie Local Ground North Gate ajanga Razhu Point Junction leni aotsü. Razhu Point Junction nungi

Khouchiezie Local Ground North Gate leni gari aotsü memelatsü.

Maneni Razhu Point, NST, DC Office lenmang aser Phoolbari nung yokyatsüyartem ajak bypass lenmangi odaktsüogo. Municipal Council aser Town Street Vending Committee-i takaratiba nung parnok mapa tenzüka yoktsü asoshi anepalutsütsü.

Bypass lenmang nung gari anentsü memelatsü aser Razhu Point Junction nung two wheeler taxi parking ya Ozone Cafe opposite nung parnok anentsüba tesemi belener aotsü, ta kasa sangdong ajanga metetdaksüogo.

Kohima CEO-i IICDEM indang metetdaksü

Dimapur, Aenjeti/January 17 (TYO): Chief Electoral Officer Nagaland, Kohima office sangdong ka ajanga, India International Conference on Democracy and Election Management (IICDEM) 2026 ya democracy aser election ketdangsüba dak sendakba nung alima nung iba amala mesükba conference tulutiba asütsü, koba Election Commission of India-i ayongzüka January 21 nungi 23 tashi Bharat Mandapam, New Delhi nung amungtsü ta metetdaksüogo.

Ajak senteper iba sentong nung linük 85 nungi

International delegate 100 shi-shilem agitsü. Iba international conference agiba mapang bilateral senden 40 dak tema amentsü renema lir, aser iba ajanga iba senden ya Election Commission of India-i aniba global electoral managements senden tongtibangtiba ka küm daksür.

IICDEM 2026 nung Thematic lokti sensaksem 36 agitsü. Sensaksem mapang election ketdangsüba dak sendakba nung National aser International academia tem nungi mongintem aser alima nung EMB lenirtemi lenla ajak ayimjema jembitsü.

Chief Minister-i asükhu lemsatep

Dimapur, Aenjeti/January 17 (TYO): Nagaland Chief Minister Dr. Neiphiu Rio-i, Rev. Dr. Rieweh Robert Cunville NEIGRIHMS Hospital, Shillong nung January 17 nü asüba osang angazüka mang ayimba lemsatepogo.

Rio-i ashiba agi, pa asüba ya alima nung Khrista dak amangertem aser pa ministry ajanga kongshiba aser melenshiba nisungtem atema takoksa tulu lir.

Rio-isa, Rev. Cunville ya lanuwa nungi ministry tenzüker aser taküm tepeyong bendanga agüja tezükogo. Pa ya ajemalu, tasü tait aser tamang takang akaba nisung ka liasü. Rev. Cunville-i tamanger aser mamangertem taküm aika dak kongshiogo aser Tsüngremi pa anilen ajak Khrista osang tajung bener jajaogo, ta ashi.

Rev. Cunville ya Nagaland den kanga junga sendaktepa liasü. Pa lenisüba aser North East Christian Council Secretary ama 1972 küm Kohima nung Billy Graham Crusade nung sentong takok ngua

ayongzüker aser Naga nunger aika asoshi tanüla nung tajangzü kadaktsüogo. Iba ajanga tamang, timla aser asüngsashi metsü proka toktsü koba tanü tashi süngjang tangdar, ta CM-isa shisem.

Maneni CM-i, 2025 küm November 30 nü Rev. Cunville-i Kohima semdangba bilemtetshia jembi, kong tamangertem meyrejang aika IG Stadium nung adenshia Tsüngrem külemogo, koba teti menungra bilemtettsü asoshi Nagaland asoshi otsüsütsü mapang ka liasü, ta ashi.

Mangyim jashi tia nung aliba mapang Nagaland sorkar aser state nung Khrista dak amangertem tenüng nung par kinunger, külem tenzüker aser Billy Graham Evangelistic Association den asükhu lemsateper. Tsüngrem tenzüker aser Arogo tembar ka asüba onoki mang ayimer. Asükhu koktettsü atema asür kinungertem nem anisüngzüker, tashi aser yimjung agüjang aser asür tanüla teti tatem makdak anisüngzükdakjang ta sarasademtsü, ta CM-isa metetdaksü.

India nung tang mezüing Vande Bharat sleeper train tenzükogo



January 17, 2026 nü West Bengal kübok Malda nung Ato kilonser, Narendra Modi-i linük nung tang mezüingbuba Vande Bharat sleeper train tenzüksüdang tangokba noksa nung angur. Iba train ya Howrah (Bengal) aser Guwahati (Kamakhya) tsüingda senzüsü.

Malda, Aenjeti/January 17 (Agencies): Honibarnü West Bengal kübok Malda nung Ato kilonser, Narendra Modi-i linük nung tang mezüing Vande Bharat sleeper train tenzüksüogo; iba train ya Howrah aser Guwahati na tsüingda senzüsü.

Ato kilonser Narendra Modi-isa West Bengal nungsa sen crore 3,250 jenjang railway aser gari lenmang dak sendakba project aika tenzüksü.

Malda town railway station nung ayongzükba sentong nungjisa Modi-i video conferencing ajanga Amrit Bharat Express trains pezü tenzüksüogo; item train ji New Jalpaiguri, Nagercoil aser Tiruchirappalli tsüingda senzüsü aser Alipurduar nungi SMVT Bengaluru aser Mumbai (Panvel) tashi senzüsü.

Air-conditioned sleeper train tasenba ya ajanga Howrah aser Guwahati na tsüingda

ghonda 2.5 dang agitsü. Tang tashi nungbo yimti ana tsüingda ghonda 18 shi agir.

Iba sentong nung jembidang Modi-i, item projects, talisa train tasen senzü tenzükba ajanga region nung aliba lanurtem nem tashi agütsüsü, ta ashi.

"Mapang ka nungbo asenoki bendang linüktem nung terenlok aliba repranga liasü aser item ama train tasenji nükshia liasü. Tanübu iba mangdang atangji atalokogo. Vande Bharat sleeper train tasenba ajanga temeshi li Maa Kali aser Maa Kamakhya na sendaktepogo. India nung tangbo transport facilities tajung lir aser ibaji ajanga asen linüki tangar dak memetaloker," ta Ato kilonseri metetdaksü.

Paisa, "Tangbo Europe mesüra US na dang nungibo asen linük nung railway coaches teimba yanglur. Terenlok aliba linük ka atema

mera agia tanü nungi Vande Bharat sleeper train senzü tenzük. Train tasenba ya ajanga linük nung nüburtemi ain talang senzüba tezübaba akümtsü," ta metetdaksü.

Tarutsü nungbo Vande Bharat sleeper trains ya linük tesem ajaklen senzüsü, ta pai ashi.

"Tang linük tesem balala nung Vande Bharat train 150 dak tali lir. Iba denji külemi kanga keraa senzüba train aika yangludar," ta pai ashi.

Kasa sentong nung jembidang Railway Minister Ashwini Vaishnaw-i, kobi melii India-i linük nung yangluba Vande Bharat trains ya tanga linüktem dangia yoktsü, ta ashi.

Modi-i anogo ananü tsüingda West Bengal aser Assam nung tesem aika sema senzüsü. Taküm West Bengal aser Assam na densema state pezü aser Union Territory ka nung assembly elections agitsü.

BJP Tir tasenba January 20 nü sangdongtsü: BJP

New Delhi, January 17 (Agencies): BJP National Tir election atema January 19 nü nomination file asütsü aser tang Tir teinyakdak, J P Nadda melenzüksüasang tenüngji January 20 nü sangdongtsü, ta BJP-i metetdaksü.

BJP Tir menden atema nisung ka dak talii nomination file süra January 20 nü election agitsü, ajisüaka working president Nitin Nabin dak alaka shingaa nomination file masütsüa akok.

BJP-isa electoral college list sangdongogo, aser iba nungji Ato kilonser Narendra Modi nungi tenzüka local member tem tashi nung voters 5,717 lir.

Ato kilonser Modi den Home Minister Amit Shah aser Defence Rajnath Singh na densema cabinet züngsemtem aser chief minister temi BJP Tir menden atema Nabin tenüng benoka nomination papers agütsüsüa akok.

BJP National Tir shimtsü

aliba dak sendakba nung Ato kilonser Modi aser RSS tongti, Mohan Bhagwat na tsüingda ita aika obang meputepi aruba sülen tang tesüsa ajaki melungtepa Nabin shimtsüa akok.

Nabin den tetokteper melira BJP National Tir inyaka arurtem rongnung tanubosangji pa asütsü. Tang Nabin ya arrshi küm 45 dang lir.

Küm trok tejaklen (January 20, 2020) JP Nadda BJP National Tir shima liasü.



Khunti, January 17, 2026: Jharkhand nung Khunti district kübok tribal yim ka nung tongti yimsüsür ka tepsetba anema Jharkhand 'bandh' ayongzüka akaba mapang longkak aitertemi lenmang mokdanga aliba noksa nung angur.

Iran nungi India nunger aika meyipa arur

New Delhi, January 17 (Agencies): Iran nung nüburtemi longkak aita tensa ano tamajungba dang akümba mapang Hokolbar aonung Iran nungi India nunger aika New Delhi nung aliba Indira Gandhi International Airport tonga aruogo, ta osang ka ajanga metetdaksü.

Tesüiba hopta ana tsüingda India sorkari Iran nung aliba sensotem dang tekeraba nung iba linükji toktsür arutsü mesüra kanga kümdanga alitsü aiben metetdakja aruogo.

Ministry of External Affairs-ia, India-i Iran tensaji mita reprangdar aser iba linük nungji aliba sensotem kümzüksü atema nüngdakba ajak inyaksü, ta metetdaksüogo.

Hokolbar aonung Iran nungi arur kati, "Iran nung tensa kanga mejungi lir. India sorkari kanga amalitepa inyakdar aser Indian Embassy-ia onok dang tekeraba nung Iran toktsür aotsü ajungshia liasü," ta ashi.

Iran nungisa meyipa arur kati, "Onok ita ka atema ao, ajisüaka tesüiba hopta ka-ana tsüingda onoki timtem dang ajangshia aruogo. Onok kimai ayazüka lura longkak aitertem onok anasa arua timtem agütsü. Iba dak alia internet shibangba ajanga onoki kinüngertem nem osang kecha magütsütet. Onok kanga shisabulua liasü. Onoki Indian Embassy den-a tongtepratep mesüteti liasü," ta ashi.

Ano Jammu & Kashmir nungi India nunger kati, "Ni Jammu & Kashmir nungi lir. Yangji (Iran) longkak sashia aiter. India sorkari kanga meranga inyakba ajanga kaketshirtem meyipa anir aru," ta metetdaksü.

Iran nungi meyipa arurtem agizüksü atema kinüngertem Indira Gandhi International Airport nung adenshia liasü.

Tamalen Iran yimtiba, Tehran nung aliba Indian Embassy-i India nunger kaketshirtem, business inyakerter, temeshi ainlen jartem aser raliwalirtem dang commercial tayimtsü densema transport balala ajanga Iran toktsür aotsü ajungshia liasü.

Ano New Delhi nung Ministry of External Affairs-ia India nungertem dang sangdong ka magütsü tashi Iran-i maotsü metetdakja liasü.

MEA-isa Iran nung aliba India nungertem dang akokba tashi kimai mayazüksü, longkak aitba nung shilem magütsü aser kanga kümdanga alitsü metetdakja liasü.

Iran nunger rial sen jenjang kanga mejungi akümba, tzü agi anüngba, light junga maruba, mapa manguba tebilemstü aser osettsüset nung jenjang kanga atuba anema December 28 nü Iran yimtiba, Tehran nung aliba Grand Bazaar nung telok kati yimsüsürtem anema longkak ait tenzüka liasü aser tangbo province ajak nung nüburtemi longkak aitar.

Republic Day jakdang yimti aika nung security akangshir



Doda, January 17, 2026: Republic Day atongtsü joko mapang ana nung lia Jammu & Kashmir kübok Doda district nung security sepaitemi lenmang nung garitem soita mita reprangdang tangokba noksa nung angur.

New Delhi, January 17 (Agencies): Republic Day atongtsü joko anogo 10 shi dang lia linük yimtiba Delhi densema yimti aika nung security akhangshio.

Khalistani aser Bangladesh nung amenoka aliba kiralongrar telok balalai India tesem balala amaktsü tebilemba aliba jangjaba sülen yimti aika nung security akangshir.

"January 26 (Republic Day) jakdang intelligence agencies-i, Khalistani kiralongrar organisations aser Bangladesh nung amenoka aliba kiralongrar teloktemi Delhi aser linük nung yimti aika amaktsü sentong lir, ta tekümdangtsü metetdaksüogo,"

ta osang ka ajanga metetdaksü.

Khalistani aser bendanglen aliba kiralongrartermi Punjab nung ozüing alema inyaker telok balala par sepaitem ama amshir, aser parnoki parnok tebilemba ataloktsü aser linük nung security raksatsüsü atema linük nung ozüing alema inyakerter networks amshir, ta kasa osang ajanga metetdaksü.

Item ama ozüing alema inyakertermi Punjab nung dang masü saka Haryana, Delhi-NCR, Uttar Pradesh aser Rajasthan state tem nunga yakyaka lir aser parnoki Khalistani kiralongrarter den tesendaktep ayur, ta intelligence agencies-isa metetdaksü.



TIR YIMYIM YIMOBILEM (EDITRIAL)

DIMAPUR SUNDAY, JANUARY (AENJETI) 18, 2026

Taküm nung temoatsü

Alima nung taküm alitsüba ya temoatsü dang masü saka timtema jenti lir. Khenken pelar aser khenken jashir, khenken takok angur aser khenken tamakok angur, khenken anema alir aser khenken shiranger aser ano khenkenbo tangari asen nung sanga jembir saka ano khenkenbo asen indang majung jembir. Item ama tensa tajung majung aika iba akümüli nung arishi tatsüka alidang asenoki ajurur. Iba ama mapang nung asenoki ajuruba tensa tia indangji asenoki angateta agira, tensa majungbaji tesüsabo tajung agi melentsü. Aiben, asen tsürabur, apuani mesüra tanurtemi asenok jashidaktsür. Khenken asenok adianu aser medemertemi asenok ashioktsür. Aji oda, iba ama mapang nung asenokia parnok nem kechi meyipa agütsür ? Tangari asenok jashidaktsü dang mesüra asenok shirang dang aiben asenoki asenok kanga ilaa bilemer, tejashi maremteter mesüra maksü makoker. Idangji, ano lendongang tuluba ajurur. Asenok shirang dang mesüra tamakok angu dang asenoki aiben Tsüngrem dang atonger. Aji oda, Tsüngremibo asen tamakok angutsüsa, asen jashitsüsa aser asen shirangtsüsa kecha meinyak ser nung, asenoki aiben Tsüngrem aitsür. Iba jagi, amajok nung aiben nisungtemi Tsüngrem nem tai agütsür. Ajisüaka, asenok tamakok angubaji, Tsüngremi masü asenoki meranga meinyakba agi aser asenok shirangbajia Tsüngremi masü saka asenoki kümdanga maliba agi asütsüa akok. Asen taküm nung kechi atalokdir atalokaka, Tsüngrem sentongbo tajung dang asür. Ajisüaka, asen taküm nung tajung aser tamajung shimtetsüsbaji Tsüngremi asenok nem shisatsü aser tangatetba tashi agüja lir. Tsüngremi kodanga asenok nem tajung-tajung dang shimteter magütsütsü mesüra tamajung-tamajung danga shimteter magütsütsü. Alima nung tajung aser tamajung ajak nangokja lir, anungji itemji bendanga shimtetsüsbajibo asenok mulung. Aji oda, kodang nisungi mapa tajung shimteta inyaker Tsüngrem pelar saka kodang nisungi mapa tamajung shimteta inyaker, idangji Pa mepelar. Laishiba nung tajung aser tamajung bendangtetba aser timtem-lendong tia angatetba nisung ka lir. Paji Yosep. Yosep otsü ya asenoki Lipok tapu 37 nungi 50 tashi nung tezüngnüsüka shia angutsü. Pa ya jabaso 12 aliba nübener kibong nungi tanubusang den atongba jabaso ka liasü. Nubener rongnung tebui tedi nungertem dang nungi alaka pa dang meimba agi tedi nungertemi pa dak tenük merem aser tepseta endoktsü lia, parnok ajak tia junga tetepsetbo metepseti tangar dang alar asütsü ayok. Iba sülen, Egypt nung tamarener ki ka nung Yosep alar inyakba mapang, pa kibur kinüngtsüi pa dak saklok aser azüapong saka pai la den memedem. Iba jagi kibutsüla jagi jashir la anema yazü ken o agütsür tepuokdak ayu. Ajisüaka, item timtem ajakji pabo Egypt lima nung prime minister akümtsü atema jenjang alangteterba liasü. Iba lenmangji pai shimtet. Ashiko, asenok asübo pa aliba kibutsüla den medemtsüba lenmangjiang shimtetla aser idakji lendong ajurur asen taküm tembangla. Ajisüaka, Yosep-i teti shitakba lenmang shim, kechiyong Laishiba nungji ashir, 'pa den Kibuba dena liasü'. Shitakba lenmangji teshimbo pai shim saka pa den Tsüngrem dena aliba agi pai shitakba lenmangji shimtettet. Ibaji asenok ajak atema tanü tangazüktsü temoatsü ka südaktsüdi. Timtem toudi ajak kokteter, pa yimsüsür tular kümer lia, pa ayoker tedi nungertem aya marem aneti aru. Idangji, pai ashi, "nenokibo kü dak tamajung inyaka saka Tsüngremibo asenok taküm kümzüktsü asoshi inyakba liasü." Iba ama tensa mapang ka nung, asenok ashioktsür dang, iba ama o tajung, nisung o Tsüngrem na pronglai pelatsüsa asenokia shitetsüsa o tajung shimtettetsü asü ta aiben temulung rongba bilemer. Aji oda, asenok makamaitba, asenok tamakok anguba aser asenok shirangba timtem ajakji asenoki aremtetra Tsüngremi moatsütsü. Ajisüaka, asenoki makamait marem ochimashi inyakra, tamakok marem jashia mapa tamajung inyakra aser shirang marem asenoki Tsüngremi shirangdaktsür amai bilemra, iba jagi asenoki Tsüngremi mulungba jenjang aser mapangji metongtetsü. Laishibai ashir, shirnoki Tsüngrem meimer, parnok dangbo Pai teti tajung dang inyaker. (Rom 8:28). Tetezü , Pa nükjidong ataloktsüsa jajarterm atemabo tanü ajuruba timtemjia asüng asoshibo tajung asütsü.

OLEMSABANG

Ao kin temenen bushia temulung meyiptsü mapang kati menepogo

~ L. Kika Pongener.

(Yashi adok nungi...)

Asenoki asen jenjang masadanger dang ashi, asen Aotsür Aor jenjang kangasa mejungi kümogo. Asenok akhidang tangar kin tenuk melapokdang khen lennir asüba-to (Passed Glory) tanüa iba jenjang nung-tosa lir amai bilema; asen sasa tiak sanga o tulu-lu jembir dang ashi; tanübo shitakba (Reality) nung asen jenjangji asadangra tangar kintem dang taaktsüka kümogo. Dimapur aser Kohima ama jila nung Aotsür Aor meyong ki tulu/talang tajung para (Rent) lakh aika angutsüsa kwika lir...??? Dimapur ama Commercial City nung Aor meyong 'Car Show Room' & 'Shoping Mall' iba amala Business Establishment tulu; Aotsür Aor meyong kwika lir....??? Aotsür Aor Authorised Dealer/Agency & Wholesaler kwika lir....??? Sorkar mapatong Department balala nung tekolak menden nung amenertem reprangdangra; tanübo Aotsür Aor aika mali kümadokogo. Linuk tenzükba aser nujiso bushiba telok nunga reprangdangra; Aotsür Aor-bo tangar sulen anidaker dang kümogo. Tanü Aotsür Aor Politician-tem jenjang reprangdangra; Chief Minister menden nung mener Naga nunger anitsüsa, mesura tangar kini temulung lemteta anidaktsüsa Politician lennir takotet kata mali kümogo. Surabangla, asenok kechi ka nung ajemdaker tiak sanga o tulu-lu jembir....??? Aotsür Aor shinga dak-a kati ka nem yimli agütsütepba shisatsü mali, pei ajung dang asaba shisatsü agi sunga lir. Aotsür Aor dak nukmerem aser mokokachi shisatsü keta aliba ya meintok tashi asenok tsüngda nung temeimtep aser telongjem makatsü. Iba ama shisatsü tamajung ya meintok tashi asen Ao kin rongnungi alima anitsüsa lennir tajung madoktsü. Atangji, Ao kin ya Tsüngremi atakademba aser sentokba kin ka aküm asü ta aiben shisadanger.

Election aruba shia Ao lima nungpo tim masüba mapatem aikasa inyakteper. Election Commission-i melaba agi Election nung Contest asütsü atema India nunger senso shia temeden lir; aser vote agütsütsü atema-a India nunger senso shiai pei mulungba 'Candidate' nem pei vote agütsütsü temeden agüja lir. Aji oda, asenoki amangba Khristan yimsu tesayuba aser laishiba tesayuba nunga linuk temzüng-ozüng alema aibelena inyaktsübo sayua mali. Ajisüaka, Khristan yimsu mezüng agizüker Ao lima nung, Election Commission temzüng-ozüng anema tashiyim agi pei temeden inyaktsü memelar aser nokdang. Aji oda, mezüng Khristan yimsu agizükdak Ao lima nung linuk temzüng-ozüng anema aibelena tashiyim amshia meshitaki inyakbaji dang shitakba....Aser linuk temzüng-ozüng agi melaba ama shitakba inyakerbo merenshiba aser jentokbaji asen Ao kin lir. Tsüngrem o-i ashir, "Shirnoki tamajung dang tajung aser tajung dang tamajung ajar; shirnoki ammanng dang sangwa aser sangwa dang ammanng ama züngshir; shirnoki takü dang tanang aser tanang dang takü ama züngshir, parnok asoshi aiatai" (Isaia-5:20). Ajiser, iba ama metetsümonga aibelena inyakbaji jakdak-jakdaka nguaka, arogo nung tenzükertemi aser mungdang lennirtemi; iba ya Tsüngrem tsüngdang aibelener ta ashitsü melena mangu amai toktsür; mesura parnoka karbo iba aibelenba sulenji anidaker. Ano taoksatsü kaji....Arogo nung toklang tenzükertema karbo tongpo apua Election tashiyim mapa nungji shilem agir....!!! Anungji asen Ao kini item tai temenen ya küküa lumia sarasadema menangzükra Tsüngrem tsüngdang sentsüh aser khuret tulu asütsü.

Anungji Ao kini küküa lumia temenen nangzüktsü mapang ka tongja tongogo. Ao kini ochi nung nokdaker, ochi kuli agütsür aser ochi jembir; tashiyim agi nemdema ayutsü merangba temenen nangzüktsüla. Ao kini aibelener dang aibelenogo ta meshitetba aser aibelenba miimbanga yutsütsü merangba temenen küküa nangzüktsüla. Ordain Minister-temi anir Tsüngrem tenzükera ajaki Putir ka amai melitetba; tangar asoshi temettsüdaktsü lung ka akümba temenen küküa nangzüktsüla. Aor Tsüngrem tenzükera kari danga mungdang aser arogo ketdangsuba mapa nung ochimashi aibelena inyaka lira küküa tatok nangzüktsüla. Temalen shiyunga aruba temenen ajak ya Aor Reverend-temi anir tawa tzüsena amanger tashi ajaki lumia küküa tatok nangzüktsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

USnungChina nungeri China nung Arogotem atema sarasademtsü



January 09, 2026 nü Los Angeles nung aliba Harvest Chinese Christian Church nung tamangertemi China nung Khristanem atema sarasademtsüba sentong nung tangokba noksa nung angur.

January 17, 2026: China nung Communist party ketdangsertemi Early Rain Covenant Church mita aoba aser Arogo lenirtem apuba mapang taoba hopta US nung aliba China nungertemi China nung Khristanem atema lumia sarasademtsüogo.

January 9, 2026 nü Los Angeles nung aliba Harvest Chinese Christian Church-i "Fasting Prayer Meeting for Persecuted Churches in China" ta ser sentong ka ayongzüka agi; iba sentong nungji parnoki China nung reshikangshi ajangshiba Khristanem atema sarasademtsüba den külemi China nung aliba Khristanemi taküm kuli lemsatepba sayaa liasü. Kasa anogo nung US tesem balala nung China nunger Khristanemi online ajanga sarasademba sentong nungji shilem agia liasü.

Pastor ka kinüngtsü, Anna Liu aser Pastor Jiang'en Long nati China yimtiba, Beijing nung aliba Zion Church tenüng nung shilem agia liasü.

Lenir anati, China nung aliba Arogotemi timtem kanga ajangshir, ajisüaka Khristanem tamang jenjang ainer, aser ibaji ajanga reshikangshirtem tsübudaktsür, ta ashi.

Early Rain Covenant Church nungi Wang Ge-i, China nung Khristanem ki mita aoer aser tamangertemi timtem kanga ajangshir, ta ashi.

Guiyang Living Stone Church nung inyakertemia China nung tamangertemi timtem ajangshiba, tesem melenshia alitsüsa akümba, mapa manguba aser külemi aliba nüburtem den tesendaktep raksaba indang metetdaktsü.

Kasa sentong nung Shouwang Church, Golden Lampstand Church aser home church ministry nung inyakertemia yimti balala nung tamangertemi timtem ajangshiba metetdaktsü.

Los Angeles nung agiba sentong nungji tamangertemi osangtajung ken aten, taküm kuli lemsatep aser China nung reshikangshi ajangshiba Khristanem atema sarasademtsü.

China nung aliba Early Rain Covenant Church nung züngsemtem aika samaogo, kibong züngsemtem pilaogo aser Arogo nung lenirtem mejangjaba tesem nung pua yua lir.

International Christian Concern (ICC) nung inyaker kati, "Iba sarasadem aser tekülem sentong agitetba ya kanga temoatsü ka liasü. Yimlibilema China nung aliba house churches nung züngsemtem, talisa tepuokdak alirtem atema sarasademjang," ta metetdaktsü.

Andhra Pradesh nung Khristan evangelist team ka amak

January 17, 2026: Taoba hopta Andhra Pradesh state kübok Korrakudu yim anasa Hindu yimsü alia amangertemi Khristan evangelist team ka amak.

Khristanemji bus nung lia Hindu nungertem jagi Khristanem aika yirutsü aser minibus-a raksatsü, ta osang ka ajanga metetdaktsü.

Anantapur district headquarters nung aliba Gospel Hall Church nungi sayutsüngir 15 shi sentong ka nung shilem agia adentsü atema Korrakudu-i ao, ajisüaka yimdak Hindu nunger benjung ka temongdak asüba agi yimdaklirtemi sayutsüngitsü temelaba magütsü.

Ajioda yimdaklirtemi memela nung parnoki tanga tesem kati aotsü merang, ajisüaka parnok yim atongtsü anasa Hindu yimsü alia amanger 30 shi motorbikes nung aruba sülen Khristan sayutsüngirtem mena aliba bus ji amak.

Parnoki cricket bat, lung aser insang amshia bus kichiba raksatsüba sülen Khristanem dak azük.

Parnoki bus nungji petrol totzü shiloktsür mi senoktsütsü tebilemba liasü saka ibajibo Hindu nunger kati nokdang.

Khristanem amakba video ji social media nung prokshiogo. Hindu nungertem jagi Hindu nunger tsüngremtem tetshia Khristanem dak azük.

Tasüngnü Anantapur Zilla Pastors Welfare Association (AZPWA) nung züngsem pastor tem Superintendent of police office-i oa aibelenertem anema ken o ka benoka liasü.

Pastor tem jagi Hindu nunger aibelener 15 maitsübo jangjaogo.

AZPWA-i ken o benokba osang prokshiba sülen Korrakudu yimdak yimsüsürtem police superintendent's office-i ao aser AZPWA danga ken oji agientsü mepishi.

Andhra Pradesh chief minister aser home minister natia pastor tem dang, tarutsü nungbo Khristanem anema inyakba nokdangtsü atema state sorkari inyaktsü, anungji nenoki benoka aliba ken oji agientsüla, ta mepishi.

AZPWA tenüng nung jembidang Christian Joint Action Committee (CJAC)-i, Khristan yimsü ajanga tai atoktsü sayur, anungji onoki lanurtem anema ken o mebenoktsü, ajisüaka bus kanga mejungi raksatsüogo, anungji insurance atemabo ken o benoktsü, ta ashi.

Dalit Tribal Rights Struggle Association-ia aibelenertem nem temerenshi tulu agütsüsüla, kechiyong aibelenertem nem temerenshi magütsüra state nung kin tsüngda rara adoktsü, ta ashi.

Osangbenertem den jembidang District Honorary Tir, Madagalam Prasad-i, India linük temzüng ajanga peii melungba yimsü amangtsü, benshitsü aser tangar den lemsateptsü atema senso ajak nem temeden agüja lir, ta ashi.

Prasad-isa, loktii ozüng alema inyakba ya ketdangsertemi menokdangtetra iba ya ajanga state nung yimsü dak sendakba nung alia oa inyakba kanga ataloktsü, anungji state sorkari Khristanem kümzüksüla aser state nung yimsü balala amangertem ajak tesünep nung alitsüsa ketdangsertemi inyaktsüla, ta metetdaktsü.

ANOGO ABEN TSÜNGREM DEN PA NÜNG TESÜNGMANGTSÜ

Parnok ajak senmang nung parnok o parnok na yamai jembitepa ashi, "Ya kechi tesüngmangtsü? Kechi tesayuba tasen ka? Pai temenen tanelatem danga ozüng agütsür, aser parnoki pa dang angar."

Mark 1:27

Kodang Tsüngrem aser asenok tsükchir Satani Adam aser Eva atitang aser pa tasa nung tena tsük, idang nung jagi ali meimchir ajonga temenen talenba kübok ai. Tsüngrem den tesendaktep, kati ka den aser alima den telongjem ajonga iba nungji jagi raksa. Tatitang aser temenen lenmangtem asenok meimchir raksatsütsüsa Satan nem satem satema lenmang lapoktsü. Saka, Tsüngrem temeim tulu ajanga pa chir Yisu Khrista alimai tesünep, yimjung aser temeim bener arudaktsü. Alima teraksa ajak yanglushitsütsüba, alima nem taneptsü agütsütsüba aser temenen tasa aser pa mapatem ajak maksüdaktsütsü Tsüngrem O ain bener Yisu aru.

Yamaji, Kapernaum yimti sinagog nung Yisui temenen tanelai apuba nisung ka parnok den aliba, Tsüngrem O tashi ain ajanga aridok. Iba anogo nung nüburtemi Tsüngrem O angashiba dang masü saka Tsüngremer tashi ain tulu kulisüa temoatsü ngua liasü.

Alimar tatitang, alimar tatsüba, khuretem jenti alitsü saka Tsüngrem dak rangloker pa amanga jajaba tamanger ka ka asütsü merangdi kechiaser Pa nüng tesüngmangtsü lir, Pa dak alema anüng-ali kübok shinga mali. Amen.

Egypt nunger Khristan YouTuber ka küm pongu tepuokdak ayutsü

January 17, 2026: Egypt nung Khristan YouTuber ka küm pongu tashi mapa tasak inyakdakja tepuokdak ayutsü obendang agütsüogo.

Egypt nunger Khristan YouTuber, Dr. Aughustinos Samaan-i social media nung Khristan yimsü pusema jembibaji Tsüngrem mezüngmeshiba lir aser tim masüba nung social media amshiba lir ta court-i aitsü, ta melungtet telok Foundation for Defense of Democracies (FDD)-i metetdaktsü.

Samaan indang YouTube channel subscribe süa alirtemji 100,000 dak tema lir. Khristan yimsü anema jembibatem atema pai Khristan yimsü pusema telangzüba agütsür. Pa ya Khristan yimsü pusema jembir ka aser tanga yimsü balala medemdanger researcher ka lir.

Dr. Samaan ya yaküm October ita nung apuba sülen asüngdangyatsü atema anogo 15 pua ayu, ajisüaka pa ita aika mechioki aru.

Egypt nung Khristan telok Coptic Solidarity-i, "Tanü tashi pa atema ken o jembitsür nem case file magütsür, mesüra ken o jembitsü atema maongka magütsür, mesüra court matsüngdang temeden jembitsü atema temeden magütsür. Egypt linük temzüng nungbo pei temeden ken o jembitsü atema temeden agüja lir, ajisüaka atangji nungbo iba temeden magütsür," ta metetdaktsü.

Coptic Solidarity-isa, Egypt linük temzüng ajanga pei yimsü tangar den lemsateptsü atema temeden agüja lir, ajisüaka atangji nungbo iba temeden ya Muslim nunger nem dang agütsür, ta metetdaktsü.

Tang alima nung Khristanem alitsü atema linük tamajungtiba 50 rongnung Egypt ya jenjang 42buba nung lir (2026 Open Doors World Watch List).



Dr. Aughustinos Samaan

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tu

(n) süngdong kongsangtem talak nung tenenya sentsü tapak tapak meyitetba (leaf)

* Süngo tu kar nisungi achir aser kar shirurui achir.

Tua

(adj) temalen, azüklen (upper side)

* Lokti senden nung lenirtem temalen tua mendaktsü.

OLONG PAITEP # 7387

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidadong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7386 TELANGZÜBA**TIPIEN :**

3. Bangka, 5. Alaka, 7. Samen,
8. Tanak, 10. Shirang, 11. Atala,
14. Tatar, 16. Züngi, 17. Süngzü.

LANGTSÜNGLEN :

1. Tar, 2. Tara, 3. Bata, 4. Kimong,
6. Anünü, 9. Lemta, 10. Sentsü,
12. Tazü, 13. Lanu, 15. Kin

NAI-A YA METETTER

South Africa nungi tebu o jabaso- Luke aser Mike Bell nati 'fastest quadcopter drone' atema Guinness World Record ka nguogo. Tenati yangluba 3D-printed Peregreen V4 drone ajanga 657.59 km/h (408 mph) top speed nguteta liasü.

Mizo teloktemi PM Modi dang arrtsü atsüdangba anentsü rongshir

Aizawl, January 17, 2026

(Agencies): Mizoram nung civil society organizations-i Prime Minister Narendra Modi dang Indo-Myanmar arrtsü atsüdangtsü tebilemba meyipa reprangshitsü ayongzükogo.

Iba mapa ajanga arrtsülen aliba lisopurtem loktiliba, sobaliba aser rongsenketzung nung tetsükdaksü tulu ajurutsü ta Mizoram nung teloktemi ashi.

"Arrtsü atsüdangba ajanga international border temeket aliba lisopur kintem inyaksangshi, oshi, sobaliba aser kinunger tesentaktep nung kongshitsü" ta Mizo Zirlai Pawl (MZO) aser Zo Reunification Organisation (ZORO)-i Mizoram Governor Vijay Kumar Singh ajanga yokba joint memorandum nung shia lir.

"Mizo nunger poktetba,

putiotsü, sobaliba, oshi aser loktiliba inyaksangshi külem lir. Ajisüaka tang aliba arrtsü atsüdangba ajanga item tesentaktep raksatsütsü kechiyong British nunger yimsüsüba mapang aser ano linük nüjiso anguba sülen-a arrtsü anatsülen alirtem timtem kecha melii kasa dang liyonga aru" ta parnoki PM Modi dang ashi.

Centre-i border security alitsü aser özüng alema arurtem noktangsü atema tebilemstü abenba agizüker saka arrtsü atsüdangtsü melen tanga mapa ang inyaksü lenmang bushitsü ayongzükogo ta MZO aser ZORO-i ashi.

Centre-i United Nations Declaration on the Rights of Indigenous Peoples (UNDRIP) kübok tenangzükba

agia lir aser iba ajanga lisopur temetentem agizüker aser iba ya talisa international borders ajanga lemdanger alirtem asoshi lir ta parnokisa PM Modi dang ashi.

Tan hopta tetenzüklen MZO aser ZORO den India, Bangladesh aser Myanmar nungi Chin-Kuki-Mizo-Zomi kintemi Aizawl nung 'border fencing plan' anema lungkak aitogo.

Mizoram-i Myanmar kübok Chin State den kilometer 510 agi arrtsütepa lir.

Indo-Myanmar arrtsü ya northeastern state 4- Mizoram, Manipur, Nagaland aser Arunachal Pradesh den kilometer 1,643 lir. Iba nungi Manipur sector nung arrtsü kilometer 10 shi atsüdangogo ta ketdangsürtemi ashir.

2025 küm ASF wara ajanga Mizoram-i Rs 114.64 crore akoksa

Aizawl, January 17, 2026

(Agencies): Mizoram nung 2025 küm African Swine Fever (ASF) wara ajanga Rs 114.64 crore akoksaogo, kechiyong iba ajanga ak 9,711 asü aser wara azüoktsü atema 3,620 tepsettsüsa aküm.

"Yaküm March aser December tsüngda ASF wara ajanga kibong 3,867 dak kongshia liasü" ta Animal Husbandry and Veterinary department nung Deputy Director Esther Lalzoliani Ralte- i ashi.

ASF wara ya mezüng March 21, 2021 nü Bangladesh arrtsü anasa Lunglei district nung puteta liasü. Iba sülen nungi Mizoram nung ak 72,012 süogo aser kibong 12,500 dak kongshiogo. Iba wara ajanga Rs 1,011.27 crore akoksaogo aser wara azüoktsü mechi ak 52,979 tepset.

2023 küm sorkari ak metsürtem nem teyari agütsüba nung Rs 14.51 crore endoka liasü. 2024 küm Centre dang ak tepsetba atema Rs 24.94 crore teyari agütsütsü zülü

aser iba ya Centre o state tsüngda kasasa menoktsüba atema liasü saka ASF ajanga asüba ak asoshibo senotsü teyari kecha mali.

"ASF wara ya asükwa ajema akümer saka tatsük mapang adoker. Mizoram nungsa 2013, 2016, 2018 aser 2020 nung Porcine Reproductive and Respiratory Syndrome (PRRS) adoka Rs 10.62 crore shi alang ak meyrjang aika tepseta liasü" ta Deputy Director Ralte-isa metetdaksü.

NSU-i world-class saisaopongertem arangshitsüla: Ranjan Rao

Imphal, January 17, 2026

(Agencies): India indang sports ecosystem nung qualified coaches, sports scientists, physiotherapists, aser support staff ago anünger ta Ministry of Youth Affairs and Sports nung Sports Secretary Hari Ranjan Rao, IAS-i ashi.

Khuman Lampak Sports Complex nung National Sports University (NSU) indang 8th Foundation Day nung tongti tesemdanger o jembidang Rao- i iba ya lemsatet.

Iba sentong ya Ministry of

Youth Affairs and Sports, Government of India kübok ayonga agi.

"NSU-i linük yangerba nung tongti shilem agir aser sports o allied sciences nung world-class human resources adokdaksütsü akok. Rejutemi kiojen dang masü saka nisungtem ajanga tajungtiba atongtsü koka lir" ta Rao-isa ashi.

"NSU-i global faculty tajungtem atsür arutsüla aser alima nung sports universities tajung ka akümtsü asoshi international

collaborations akangshitsüla. Manipur nung saisaopongba sobaliba tajung lir aser India-ia Manipur nungi angazüka arishi küm ajak nungi sempet aketertem anitetsüla" ta paisa ashi.

Iba sentong nung Joint Secretary (Policy), Department of Sports Dr. Shobit Jain, IRS, Padma Shri & Khel Ratna awardee Olympian Km. N. Kunjarani Devi aser Vice-Chancellor (O), National Sports University Dr. Shyam Sundar Rath nunger aden.

Tir Maduro apuba mapang Venezuela nunger sepai 50 shi tepset



New York nung Nicolás Maduro aser Cilia Flores na obendangba okadak ka kima longkak aiter kati signboard ka amer tangokba noksa nung angur.

Caracas, Aenjeti/January 17 (Agencies): Iba ita tetenzüklen United States-i linük yimtiba maka tir Nicolas Maduro pur aoba mapang tetsür sepai teku densema Venezuela nunger sepai 47 tepsetogo, ta Venezuela indang Defence Minister Vladimir Padrino Lopez-i ashi. Mezüngbo iba tatalokba nung Venezuela nunger sepai 23 asü ta sangdonger liasü, saka defence minister-i Hokolbarnü ashiba agi January 3 nü US nunger sepaitemi linük yimtiba amakba mapang nisung 83 tepseta liasü. Asürtem rongnung Cuba nunger sepai 32 densema lir. Parnok rongnung karbo tir Maduro kümüzka toktsütsü asoshi shimba team nung densema liasü. "Bolivarian National Armed Forces amaktsüsa sepaitemi kechi tai inyak. Parnoki pei taküm bendanga agütsüogo. Parnoki tetsü tasoli tushio," ta

Padrino-i iba lendong nung asürtem nem tetushi agütsüba sentong nung ashi. Minister-isa, lendong nung tepsettertem atema memorial ka yanglutsü asoshi tesem ka mekazütsütsü, ta ashi. January 3 nü tepsetba Cuba nunger sepai 32 rongnung tasümag magütsüi aliba tanungbatem Cuba-i Brehostibarnü agizükogo. US-i military target tem nung bomb poklokja helicopter bener arua Maduro aser pa kinungsü Cilia Flores na Caracas nung par kidang nungi pur aoba mapang nisung 112 dak tema yirua liasü. US-i linük yimtiba amakba mapang civilian tem asüba tang tashi mejangjai lir. Interior Minister Diosdado Cabello-i iba hopta tetenzüklen ashiba agi, asürtem maitsü jangjatsü atema mongintemi DNA tendangtsü nüngdaker, kechiyong nisung karbo ajasa poksaogo.

Interim tir Delcy Rodriguez, shibai US-i amakba mapang asürtem atema anogo tenet mang ayimtsü asoshi sangdongogo, pai Brehostibarnü Caracas nung CIA director John Ratcliffe den ajurutepogo. Maduro pur aoba nung CIA-i tongtibang shilem agia liasü, ta Associated Press news agency-i metetdaksü. US ketdangsür kati AP dang ashiba agi, Ratcliffe-i linük ana tsüngda rongsenketzüng terenlok atema longjemer inyaktsü sensaksemogo aser Venezuela nung temesepba mozü shibelenertem densema US anemertem lidaktsütsü memelatsüla ta tekümdangtsü metetdaksüogo. Kasa mapang nung Venezuela amakba mapang Cuba nunger sepai 32 tepsetba atema Cuban nunger meyrejang aikati Hokolbarnü Havana nung US embassy kima longkak aita liasü.

Khamenei-i link mepetmesü atema US aser Israel na aitsü



Ayatollah Ali Khamenei

Tehran, Aenjeti/January 17 (Agencies): Iran lenir Ayatollah Ali Khamenei-i, linük nung hopta ishika nüburtemi longkak aitba mapang azütokshi lendong tulu atalokba nung United States aser Israel na indang indanga densema lir ta shia linük ana ya aitsüogo, aser US tir Donald Trump ya ozüing raksar ka ta shiogo. "Tang Iran anema nokdakba

ya balaka lir, kechiyong US tir-i iba mepetmesü nung shilem agiogo," ta Khamenei-i ashiba Iranian state media-i Honibarnü metetdaksü. Pai ashiba agi, bendanger tenüing nung inyakshangshirtemi linük nung azütokshi lendong aser teraksatsüba bener arutsüogo. "Israel aser US den sendaka alirtemi longkak aitba mapang teraksatsüba tulu bener

arutsüogo aser nisung meyrejang aika tepsetogo," ta pai ashi. Iran nung nüburtemi hopta ana dak tema longkak aita arudar. Iran nunger ketdangsürtemi linük nung mepetmesü adokdaksüba atema bendanger tashitem aitsüogo aser talisa Israel aser Us na aitsüogo. Linük tamendakdak raksatsüba aser indang indanga linük inyakyim nung jushiba atema linük ana ya aitsüogo. Khamenei-isa, Iran-i arrtsü adena oa jenjang agitsü ta tekümdaktsü metetdaksüogo aser aibelena alirtem merenshitsü ta shiogo. "Onoki linük nung rara madokdaksütsü, saka onoki lisopur aser bendanger ozüing raksartem merenshibo metoktsütsü," ta pai ashi. Rongsenketzüng jenjang mejungi akümba nungi tenzükba longka aitba sentong ya linük ajungai prokshiaogo aser iba ya nokdangtsü atema Tehran-i tashiyim amshi tenzükogo.

Daily Premium Car Seat Booking Service (TATA Winger AC).

Nenok menden online nung onok indang app ajanga mekazüka yuang. QR code scan süa mesüra Google play store-i ia app download sütettsü aser menden mekazüktettsü.

Offline ajanga ticket mekazüka yuner asü? na anasatiba aliba counter den tongtepratepang:

Dimapur (LenzTravels): 8731912892 (Tesem- ISBT Purana Bazar)
Mokokchung (Assortedcorner): 8414944634 (Tesem- Marsosang Complex Opp: IDBI Bank)

Tang senzüba lenmangtem:

- Dimapur ⇌ Mokokchung
- Dimapur ⇌ Mon
- Dimapur ⇌ Tseminyu

Sangra-a anisüngzüka senzüang.
Menden tajungtiba tanü mekazükang!

SCAN TO DOWNLOAD APP

Election nung Myanmar military-i nongitba party tejakdang lir



Naypyitaw nung polling station ka nung Myanmar electoral officer kati general election mezüngbuba shilem tembangba sülen voting ballots azüingba noksa nung angur.

Yangon, Aenjeti/January 17 (Agencies): Myanmar nung election tanabuba shilem agiba sülen military-i nongita yariba party tejakdang aliba Union Election Commission indang data ajanga sayuogo. Linük nung election tatembangbuba shilem agitsü anunga lir.

Hokolbarnü sayaba data ajanga election mezüngbuba aser tanabuba shilem agiba sülen Union Solidarity and Development Party (USDP)-i menden 182 akoktsü lir, koba lower house nung menden 330 aliba nung tesadang dang nungi timba lir. State broadcaster MRTV-i sayaba data ajanga USDP-i election tanabuba shilem nung menden 100 nungi 86 akokba sayuogo. Election tatembangbuba shilem ya January 25 nü agitsü lir. Human rights teloktem aser opposition teloktem densema critics temi ashiba agi, iba election ya talenba kübok mesademi agir aser iba ya military tashi temzüng ozüing kübok shitak kümdaktsütsü asoshi agirba dang lir. Military-i 2021 küm February ita Aung San Suu Kyi-i aniba sorkar atsünga liasü. Military-i sorkar atsüngba sülen nüburtemi longkak ait tenzük aser linük nung civil war ka tenzüka liasü.

Linük nung military aser telungpur telok balala raratepba ajanga election ya shilem asem küma lemsar agidar. Election mezüngbuba aser tanabuba shilem ya December 28 aser January 11 nü linük kübok jila 330 aliba nungi 202 nung agi. Election tatembangbuba shilem ya jila balala nung agitsü saka rara adoker aliba ajanga jila 65 nungbo election magitsü. National aser regional legislature naprongla atema menden ajak asosho tatembangbuba result ya January tatemlen sangdongtsü. Military otongdar Major-General Zaw Min Tun-i iba hopta ashiba agi, parliament nung house anaprongla ya March ita nungi tenzüka inyakshangshitsü aser sorkar tasenba April ita nungi inyakshangshi tenzüktsü. Election mezüngbuba shilem ana agiba mapang army anema telungpur teloktemi jila aika nung polling station aser sorkar kitem maka liasü, ta military sorkari ashi. Ajak senteper political party 57 nungi candidate 4,800-i national aser regional legislature nung menden atema toktepdar, saka linük ajunga nungbo party troki dang shilem agidar.

India Open tetsür tarep asaya nung ozü scü agi minprong



Tetsür tarep asayaba mapang kilēm nungi langka tsükba ground staff temi merekba noksa nung angur.

Aenjeti/January 17, 2026

(Agencies): Honibarnü India Open 2026 nung China tsür Liu Shengshu aser Tan Ning na aser Korea tsür Baek Ha Na o Lee So Hi nunger tetsür tarep semi-final asayaba mapang ozü scü tzüka yokba ajanga minpronga liasü.

Iba asaya ya China nunger tarep yagi 21-12, 17-21, 21-14

agi akok, saka mezügbuba game nung ozü zcü tsüzüka yoka court menentsüba ajanga asaya mapang tatsüka atema anena ata.

World Championships atema iba tesem tendanga asayaba mapang tetsür tarep asaya nung dang masü saka tebur kija asaya round of 16 nung India nunger asayar HS Prannoy aser

Singapore nunger asayar Loh Kean Yew na asayaba mapanga ozü scü agi asaya minpronga liasü. Indira Gandhi Stadium nung ya taküm küm tatemlen World Championships asayatsü lir.

Prannoy aser Loh na Round of 16 nung game asem asayaba nung mezügbuba asayaba mapang ozü scü tsüzüka yokba ajanga asaya anena liasü.

Denmark nunger Anders Antonsen aser Mia Blichfeldt nati iba asayamung ayongzüka yimya aitsüba sülen tang iba ya atalokba ajanga taitüba aika adokdar.

Blichfeldt-i iba asayamung indang condition kanga majungba aitsüogo aser iba sülen Antonsen-i linük yimtiba nung mopung kanga temenen ta shia iba asayamung nung masayatsü telemtetba agi. Iba atema pa dang USD 5000 senchi chia liasü.

Donyell Malen Roma nung denogo

Aenjeti/January 17, 2026

(Agencies): Dutch nunger forward Donyell Malen Hokolbarnü Premier League club Aston Villa nungi Serie A giants Roma nung denogo. UEFA Champions League nung asayatsü atema top-four nung season tembangtsü asoshi Roma pur merangba mapang pa team nung denogo.

Osang ajang ashiba agi, arishi küm 26 tain Netherlands nunger asayar pa loan nung oa denogo aser pa teti atema alizüksü asoshi lenmang sadema lapoka yuogo.

Striker shiba PSV

Eindhoven, Borussia Dortmund aser Villa densema Europe nung club tulutem nungi asayaogo, pai tang tashi nung club jenjang nung asaya 294 nung asayar lir aser iba mapang pai tetoktepbä ajak nung goal 104 idaktsüogo.

Dutch national team nungi asayar ya tang tashi nung linük tenüng nungi 49 ben asayar lir aser iba mapang pai goal 13 idaktsüogo. Pa 2021 aser 2024 European Championships nunga linük tenüng nungi asayaogo.

2024 European Championships nung Malen-i team nem teyari tulu agütsü aser round of

16 nung Romania den asayaba mapang pai goal ana idakja Netherlands-i iba asaya goal 3-0 agi koka liasü.

Roma pur Italian top-flight nung asaya 20 nungi point 39 ngua tang pongububa nung lir. Parnok ya temaba jenjang nung aliba Inter Milan, AC Milan, Napoli aser Juvi nunger sülen pongububa nung lir.

Kasa mapang nung Aston Villa puri tang asaya aliba season nung point 43 ngua lir aser parnok English top-flight nung tang tasembuba nung lir. Parnok Arsenal (49 point) aser City na sülen tasembuba nung lir.

SML 3 asayamung osang



Dimapur, Aenjeti/January 17

(TYO): SML 3 nung Kohima Legends aser Lhomithi SC na asaya nung Legends puri toss akok aser mezügbat asütsü shima liasü.

Parnoki over 20 nung asayar 2 out ser run 165 yanglu. Parnok rongnungi Thejaselhou Yhome-i run 67 yanglua pai ajak dang run timba yanglu aser Veri (39) aser Tapito Thupitopr (27) natia pa nem teyari agüja liasü.

Ajisüaka run arishiba mapang Lhomithi SC puri kanga junga asaya parnoki asayar 2 out ser run 168 yanglua asaya wicket ti agi akok.

Parnok rongnungi Enam Uddin-i century ka yanglua team takok dangi ania liasü. Pai SML 3 nung mezügbuba century yangluogo.

Kanga junga asaya-a team takok dangi aniba atema Enam Uddin nem Man of the Match

naroküm agütsü.

Kasa asayamung tanga asaya ka nung Esa Warriors puri mezügbat asütsü shim aser parnoki over 20 nung asayar 9 out sür run 137 yanglua liasü. Top order temi asaya junga tenzüksüba ajanga Esa puri defend sütettsüa run yanglua liasü.

Asaya tanabuba shilem nung run arishiba mapang Kohima Old Boys pur top order temi junga masayatet. Parnok rongnungi Khriesamhalie Yhome-i (run 49) dang junga asayateta parnoki iba asaya makok.

Esa team nungi bowler temi kanga junga asayaogo. Parnok rongnungi Rakesh-i wicket 4 agi aser Alongba o Raza nati wicket asemsem agia parnok asaya kokogo.

Ball kanga junga aonba atema Rakesh nem Man of the Match naroküm agüja liasü.

Hüluyi D Vadeo-i is Sechekeu wrestling championship kokogo



Kohima, Aenjeti/January 17

(TYO): Arishi küm 23 tain Hüluyi D Vadeo-i, Sechekeu Wrestling Association (SWA)-i ayongzüka 30buba Wrestling Championship kokogo. Iba asayamung ya Phek district kübok Razeba nung asaya liasü.

Sakraba nungi asür Vecüzo D. Vadeo'er jabaso Hüluyi ya tar süklep 6 talang aser temang tozüük seret 104 lir aser pai quarter final nung Thuputha Hesuh (Porba) tsükdaktsü.

Iba sülen semifinal nung pai Riivezo D Vadeo (Sakraba) tsükdaktsü aser final nung Kuvenu Puro (Porba) koka iba asayamung title benogo.

Iba asayamung akokba sülen Hüluyi sen senpet sen lakh 1

agütsüogo, koba Collective Leadership NSCN/GPRN züngsem Venüzo Zholia-i sponsor süa liasü.

Asayamung runners up ji arishi küm 21 tain Kuvenu Puro liasü aser pa nema senpet sen 80,000 agütsü, koba Minister for Power & Parliamentary Affairs indang PA Er. Chete Lohe-i sponsors asü.

Tasembuba nung tembangsang Vekhüta D Vadeo nem senpet sen 60,000 aser pezübuba nung tembangsang Dunve Thuluo nem senpet sen 40,000 agütsü. Senpet ya Abino Lasuh, (Rtd) Assistant Director (Programme), All India Radio Kohima aser Kiezo Teno, Deputy Secretary & Transport

officer, Nagaland Civil Secretariat Kohima nati sponsor süa liasü.

Under 15 category ya Porba nungi Mulusheyi Puro'er jabaso Kutho Puro-i akok aser pa nem Weprede Kenye, Entrepreneur-i sponsor süa senpet sen 30000 agütsü.

Iba asaya nung runners up ji Veshezo Swuro liasü aser pa nem senpet sen 20,000 agütsü, koba Nüvesayi Dzüdo, Entrepreneur-i sponsor süa liasü.

Tasembuba nung Lüдове Nakro liasü aser pa nem Graduate Teacher, GHS Mesulumi Vithele-i sponsor süa senpet sen 15,000 agütsü. Pezübuba nung Chure Pohena liasü aser pa nema senpet sen

10,000 agütsüogo.

Asayamung indang chief referee Zacüta Puro liasü aser pa nem Hüvesü Puro, Wekekhe Tsido, Kukuo Getsa aser Niekhuvi Lohe nungeri teyari agütsü.

Tetendangertem rongnung Rukuto Resüh, Tepe Venuh, Zano Vadeo, Wewu Mero, Kevezolo Tsüzüh aser Ngonyi Andrew Krocha nunger densema liasü.

Iba asayamung ya Razeba Adhoc Town Committee-i

ayongzüka asayaogo.

Asayamung lapokba sentong nung Nagaland's power & parliamentary affairs minister K.G. Kenye akakteta jaoker liasü. Iba sentong ya SWA tatong tir Züpelhi Resüh lenisüba nung agi aser SWA tir Shepo Dzüdo-i lokti pela agizükba o jembia liasü.

Ajak senteper iba asayamung nung senior asayar 42 aser Under 15 category nung asayar 13-i shilem agia liasü.

BILEMDANGANG

"Peisasa masü saka tangar nem nü tenüng sangdakjang."